

WORD

⁴³"Narinig ninyo na sinabi noong una, "Mahalin mo ang iyong kaibigan at kamuhian mo ang iyong kaaway."

⁴⁴Ngunit sinasabi ko sa inyo na mahalín ninyo ang inyong mga kaaway at ipanalangin ninyo ang mga umuusig sa inyo. ⁴⁵Kung gagawin ninyo ito, magiging tunay na anak kayo ng inyong Amang nasa langit. Sapagkat hindi lang sa mabubuting tao niya pinapasikat ang araw kundi pati na rin sa masasama. At hindi lang ang matutuwid ang binibigyan niya ng ulan, kundi pati na din ang masasama." **MATEO 5:43-45**

Ang madalas at alam nating pagtugon sa kaaway ay pagkakaroon ng matinding galit. Subalit, iniutos ni Jesus sa kanyang mga disipulo na gawin ang kabaligtaran nito. Bilang patunay na tayo ay mga anak ng Diyos, dapat natin tularan ang Kanyang pagkamuhi sa kasalanan subalit may pagkalinga sa lahat, maging sa mga makasalanan. Sa tuwing tayo ay nahaharap sa sitwasyon kung saan kailangang pumili na kamuhian o mahalín ang ating mga kaaway, iniutos ni Jesus na lagi nating piliin ang magmahal. Sa araling ito, ating alamin kung paano natin mapaparangalan ang Diyos sa pakikitungo natin sa ating mga kaaway.

1 Gumawa ng Mabuti

³⁸"Narinig ninyo ang sinabi noong una, 'Mata sa mata, ngipin sa ngipin.' ³⁹Ngunit sinasabi ko sa inyo na huwag ninyong gantihan ng masama ang gumagawa sa inyo ng masama. Kung sampalin ka sa kanang pisngi, iharap mo pa ang kaliwa." **MATEO 5:38,39**

Kapag tayo ay ginawan ng mali, maaari nating ilagay ang bagay na ito sa ating mga kamay at gumanti, o kaya ay ipagkatiwala ito sa Diyos at parangalan Siya sa pamamagitan ng ating tugon sa sitwasyon. Paano natin mapagtatagumpayan ang kasamaan (Mga Taga Roma 12:21)?

2 Pagpalain

Idalangin ninyo sa Diyos na pagpalain ang mga taong umuusig sa inyo. Pagpalain ninyo sila sa halip na sumpain. **MGA TAGA ROMA 12:14**

Sa tuwing may taong nagsasabi ng masama tungkol sa atin, maaari tayong magsabi din ng masasamang bagay o magbigay ng sumpa sa kanila. Maaari namang pagpalain at ipanalangin na lang sila. Alalahanin ang isang pagkakataon kung kailan pinili mong pagpalain sa halip na isumpa ang isang tao. Ano ang nangyari sa sitwasyong ito?

3 Magpatawad

²¹Lumapit si Pedro kay Jesus at nagtanong, "Panginoon, ilang beses ko po bang patatawarin ang kapatid na laging nagkakasala sa akin? Pitong beses po ba?" ²²Sumagot si Jesus, "Hindi lamang pitong beses kundi pitumpu't-pitong beses." **MATEO 18:21,22**

Sa tuwing nahaharap tayo sa mapapait na sitwasyon, maaari tayong magkimkim ng sama ng loob, o kaya ay sumunod sa utos ni Jesus na magpatawad. Sa iyong palagay, bakit ipinag-uutos ni Jesus na tayo ay magpatawad ng pitumpu't pitong beses? Bakit tayo dapat magpatawad nang hindi naglilista ng mga kasalanan ng ibang tao laban sa atin?